



REPÚBLICA DEMOCRÁTICA DE TIMOR-LESTE

**ALOKUSAUN
SUA EXELÊNSIA PRIMEIRU-MINISTRU
KAY RALA XANANA GUSMÃO NIAN
IHA OKAZIAUN SERIMÓNIA ABERTURA KONGRESU
KÂMARA KOMÉRSIU I INDÚSTRIA TIMOR-LESTE**

16 Abril 2010

Otel Timor, Dili

Exelênsias,

Membrus Governu

Distintus Konvidadus

Maun-alin Emprezárius sira hotu,

Senhoras no Senhores

Ksolok boot tebes mai ha'u, tanba bele mai loke Kongresu Nasionál ida ne'e, hodi harí Kâmara Komérsiu i Indústria Timór-Leste nian foun ida.

Realizasaun Kongresu ida ne'e, hanesan rohan husi prosesu diskusaun, argumentus no akordu ida ne'ebé naruk tebetebes.

Tinan ida liubá, iha 14 Marsu 2009, ita hasoru-malu iha Ministérius Negósius Estranjeirus, hodi hahú prosesu ida ne'e.

Iha tempu ne'ebá, ha'u husu ba maluk sira hotu, atu servisu hamutuk hodi harí Kâmara Komérsiu i Indústria foun ida.

Ha'u husu atu imi kaer ida ne'e hanesan kauza nasionál ida, hodi dezenvolve ita nia nasaun.

No ha'u husu mós ba imi, atu dezenvolve liután setór privadu Timór-Leste nia forsa no kapasidade.

Ohin, liutiha tinan ida, ho laran kontente ha'u bele dehan ba imi, katak setór privadu simu duni ona dezafius hirak ne'e tomak; no imi prontu tebes duni, atu hili Prezidente ida ba Kâmara Komérsiu i Indústria Timór-Leste nian ne'e, ne'ebé, foin primeira vez bele unidu.

Imi hotu halo servisu ne'ebé maka'as tebes, atu bele to'o iha pontu ida ne'e. Imi fó imi nia tempu no hasai imi nia osan rasik, ba kauza komún ida ne'e.

Estabelesimentu Komisaun Instaladora, grupu ida ne'ebé halo parte líderes setór privadu sanulu-resin ida (11), tau tán konsultores téknikus sira, hatudu duni katak imi bele halo

diferensa boot ho imi nia knaar ne'e.

Komisaun Instaladora servisu ho pasiênsia i konsentrasaun. Dala barak haksesuk-malu, maibé servisu nafatin hodi buka hetan objetivu ne'ebé komún. Imi konsege dezenvolve rasik Konstituisaun ho rejimentu Kongresu nian ida, ba Kâmara Komérsiu i Indústria foun ida ne'e.

Importante liu, konsege konkorda kona-ba fundamentu, estrutura no operasaun Kâmara ne'e nian iha futuru. Ne'e mak halo ha'u fiar liután, la'ós de'it kona-ba órgaun ida ne'e nia futuru, maibé ba setór privadu Timor-Leste nia maturidade.

Ha'u hakarak agradese ba maluk sira ne'ebé kaer Komisaun Instaladora, ba buat hotu ne'ebé imi halo ona, no husu atu imi kontinua servisu maka'as nafatin hodi asegura katak Kâmara foun ne'e, bele hetan susesu.

Ha'u hakarak mós agradese ba organizasoens hirak ne'ebé tulun Komisaun Instaladora hala'o knaar ida ne'e – hanesan Better Business Initiative of the Internasional Finance Corporation, Victorian Chamber of Commerce and Industry, International Labour Organization no empreza CRA iha Dili.

Organizasoens hirak ne'e mak partilha vizaun no la'o hamutuk ho ita, tuir ita nia dalan.

Ohin, ha'u kongratula delegadus hotu-hotu ne'ebé mai tuir Kongresu ida ne'e, balu mai husi dook, atu harí, ba primeira vez, Kâmara Komérsiu no Indústria Timór-Leste nian ida, ne'ebé bele unidu no independente.

Senhoras ho Senhores,

Kongresu ida ne'e iha delegadus husi distritus hotu-hotu no husi setór privadu Timor-Leste nian tomak.

Delegadus ne'ebé mai tuir kongresu ne'e, iha responsabilidade ne'ebé boot tebes. Imi tenke hili Prezidente ida ne'ebé bele lidera Kâmara ne'e ho profisionalizmu, badinas no matenek i ho laran tomak.

Imi tenke atua ho dignidade no integridade hodi bele simu no apoia nia rezultadu.

Desizaun ne'ebé imi halo iha Kongresu ida ne'e, Governu sei rekonhese – no Governu mós sei fó apoiu tomak.

Ha'u husu mós ba imi atu hili ema independente ida ba Xefe Ezekutivu Kâmara ne'e nian, atu bele kaer didi'ak servisu loroloron nian.

Kâmara ne'e tenke funsiona ho profisionalizmu hodi nune'e, bele presta servisus ba nia membrus sira hotu, no apoia dezenvolvimentu setór privadu Timor-Leste nian.

Liuhusi organiza-malu hamutuk iha Kâmara Komérsiu i Indústria nia okos, mak imi sei bele koalia ho lian ida de'it, fahe malu experiênsias no matenek i servisu hamutuk hodi harí ita nia nasaun.

Kâmara ne'e sorte, tanba sei hetan apoiu finanseiru husi Governus Alemanha ho Austrália, ne'ebé ha'u husu ba imi, atu halo parseria ho doadores sira ne'e, hodi dezenvolve imi nia organizasaun.

Importante mak, Governu Timor-Leste sei fó mós asistênsia finanseira ba Kâmara ne'e, hodi tulun harí atu sai órgaun ida ke independente no efetivu.

Senhoras ho Senhores,

Setór privadu bele sente orgulhu ho buat hotu ne'ebé hetan ona, iha tinan rua ne'e laran.

Ekonomia sa'e buras, ho taixa kresimentu ekonómiku ne'ebé aas tebes i atividades ekonómikas barabarak iha nasaun tomak laran.

Ida ne'e atu bele fó servisu ba ita nia Povu, infra-estruturas ba ita nia dezenvolvimentu no bein-estár ba ita nia nasaun tomak.

Governu hala'o dadaun nia papél, hanesan kria ambiente ida ke konduzivu, hodi dudu kresimentu setór privadu ba oin.

Ami halo ida ne'e, tanba ami hatene katak dezenvolvimentu setór privadu, importante tebes

duni ba dezenvolvimentu no kresmentu ekonómiku paíz nian.

Ita hetan pozisaun di'ak ida iha Timór-Leste. Rejiaun Ázia tomak hanesan sentru ekonomia mundiál, inklui Xina ho nia kresmentu rápidu i ekonomia ida ke boot tebetebes, ho mós ekonomia Indonézia nian ne'ebé komesa sa'e maka'as.

Ita labele lakan oportunidade atu halo parte iha istória ekonomia Ázia nian, ne'ebé hetan susesu boot.

Governu determinadu ona atu servisu hamutuk ho imi hodi garante, katak Timor-Leste bele oferese kondisoens negósiu no ekonomia nian ne'ebé setór privadu presiza, atu bele kontinua dezenvolve.

Ne'e mak razaun tansá Governu prepara daudauk Planu Dezenvolvimentu Estratéjiku ida – hodi orienta no halo planu ba ita nia NASAUN nia dezenvolvimentu ekonómiku i sosiál.

Iha Segunda-Feira mai, ha'u sei komesa fó volta, ba to'o sub-distritus iha Timor-Leste tomak laran, atu koalia ho ita nia Povu kona-ba buat ne'ebé ita bele halo, hodi nune'e, povu nia mehi iha vizaun 2020, bele sai realidade.

Ha'u mós hein atu halo diskusaun kona-ba Planu Dezenvolvimentu Estratéjiku ho Kâmara Komérsiu i Indústria no mós ho imi hotu.

Senhoras no Senhores,

Ha'u hakarak rona kona-ba rezultadus husi Kongresu ne'e, aban.

Maibé, se Kongresu ida ne'e hanesan rohan husi prosesu naruk ida, bele signifika mós inísiu husi misaun ida ne'ebé, boot no naruk liután.

Misaun ida ne'e, mak oinsá bele kontinua servisu hamutuk nafatin, hodi harí Kâmara Komérsiu i Indústria ida ne'ebé halo membrus hotu-hotu bele sente orgulhu; no paíz tomak mós sente orgulhu.

Misaun atu harí Kâmara ida ne'ebé, bele kaer papél centrál iha ita nia NASAUN nia

dezenvolvimentu.

Ha'u dejeja ba imi hotu susesus boot iha esforsu ida ne'e, no husu ba imi hotu atu hala'o misaun ne'e ho ojetivu ne'ebé firme; i hanesan kauza nasional ida.

Obrigadu barak!

Kay Rala Xanana Gusmão